

Date – 27/02/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n Mizoram ei leh bar ti hmasawn turin hmeichhia ten an thawhhlawk hle a ti .
2. Mizoram Pradesh Congress Committee chuan tunhnaia Sawrkarin sawhthing a lei ah sawhthing chingtute dem zawnga thusawi a awm chu pawl a tih thu a sawl
3. Prime Minister Narendra Modia chuan Mahakumbh neih zawh tak chu inpumkhatna kutpui anih thu a sawl
4. Union Minister of Commerce and Industries Piyush Goyal chuan vawiin khan Bharat Calling Conference 2025 Mumbai ah a hawng.

<><><>

NITI WEP CHAPTER

Chief Minister Pu Lalduhoma'n Mizoram ei leh bar ti hmasawn turin hmeichhia ten an thawhhlawk hle a ti a, theihna sang tak an nei tih sawiin hmasawn zelna tur tam tak a awm tih a sawl.

He thu hi vawiina Mizoram University Auditorium-a NITI Aayog State Support Mission hmalakna hnuaia Women Led Development through Entrepreneurship workshop a hman pui na ah sawiin Chief Minister chuan, India hmarchhak a NITI WEP chapter bultan nana Mizoram an rawn thlan avangin NITI Aayog thuneitute chungah lawmthu a sawl a. Mizoram economy-ah hmeichhiaten an thawhhlawk hle tih sawiin sawrkar chuan thalai leh mahni kutkawih eizawna bultan te tan tanpuina tur Bana Kaih hnuaiah a ruahman a ti a, pilot phase-ah Progress Partner 517 te chu thawhpui turin an thlang tih sawiin an zinga 140 (za zela 27%) chu hmeichhia an ni tih sawiin scheme chu hmeichhe tam zawk ten an chhawr zel a beisei a ti a. NITI Aayog chu Bana Kaihah leh Scheme dangah thawkho turin an inpeih reng tih a sawl bawk.

NITI Aayog Member Dr. VK Paul pawhin thusawiin, Mizorama hmeichhia mahni kea dinga, sumdawna kalpuiten Women Entrepreneurship Platform chu an tangkaipui ngei dawn a ti a, A tam thei ang ber WEP ah inziak lut se an duh tih sawiin Hmeichhiate tihhmasawn chu India ram ram

chang kang a thlen theihna tura tihmakmawh a nih avangin Prime Minister-in a ngaipawimawh a, NITI Aayog in nasa takin an bawhzui tih sawiin NITI Aayog in WEP kal tlanga hna a thawh dan tlangpui a tarlang bawk.

<><><>

FILM WORKSHOP

I&PR Minister Dr. Vanlalhlana’n Mizo thalaite chu khawvel hmuh ah an thiamna leh theihna phochhuahna atan Film hmang tangkai thiam turin a duh tih a sawi.

Information & Public Relations Department buatsaih ni 2 awh 'Film Workshop for local Film makers' a hawnna ah he thu hi sawiin Dr Vanlalhlana chuan Film chu khawvel leh India ram ah ngei pawh Industry changtlung sa tak a nih thu sawiin film lama tui Mizo thalaite chuan khawvel hmuh ah an thiamna leh theihna phochhuahna atan leh eizawnna kawng a dinchhuah nan hmang tangkai thiam turin a chah a. Film siam in a ken tel lemchan thiam bak ah script ziah, rimawi leh thuam inbel tur ngaihtuah te, make up chi hrang hrang hmanthiam chu Film Industry peng pawimawh tak a nih thu Minister chuan sawiin heng lam a tuimite pawh hian Film Industry an hman tangkai thiam a pawimawh thu a sawi.

Dr. Vanlalhlana chuan I&PR department buatsaih Film Worshop-a tel film siam thin te, film siam leh chan lam a tuimite leh zirlaite chu Workshop atang hian thil thar an tangkaipui tur leh hmasawnpui tur zirchhuak ngei turin a chah a, khawvel huap ang pawh a zahpuiawm loh kutchhuak neih tum turin a fuih bawk.

Ni hnih awh 'Film Workshop for Local Film makers' ah hian Pu Joshy Joseph, Kochi Kolkata Cocktail Production chu Resource Person a ni a. Workshop kalpui chhung hian 'Story telling technique', 'Importance of Sound design' bak ah Grant Thornton atangin 'UNNATI for Film Industry' tih thupui hmangin zirtirna neih a ni dawn a ni. I&PR buatsaih Film Workshop-ah hian Mizo film Director, Actor, Videographer, film siam lam a tuite leh MZU atangin Mass Communication department zirlaite an tel a ni.

<><><>

CONGRESS PRESS CONF

Mizoram Pradesh Congress Committee chuan tunhnaia Sawrkarin sawhthing a lei ah sawhthing chingtute dem zawnga thusawi a awm chu pawl an tih thu sawiin Department lamin sawhthing an lak khawm kawnga an fimkhur lohna ah sawrkar chu hma la ngam turin an phut tih an sawi.

He thu hi vawiina Aizawl Press Club-a thuthar thehdarhtute an kawmna ah sawiin Congress Farmers Department Chairman Pu Lalrinliana chuan sawhthing la khawmtu sawrkar fimkhur lohna ah mawhphurhna la ngam zawk se an duh a ti a, ZPM Sawrkar chu a intiam ang ngeia kuthnathawktute chin

sawhthing chu lei sak vek se an duh tih sawiin an rate bituk cheng 50-a lei sak vek turin an phut tih a sawi.

MPCC chuan sawrkarin sawhthing a lei danah ngaih thatlohna tam tak a awm tih sawiin khaw hrang hranga lei tura an ruahman zingah a vaia lei loh a tam an ti a, kuthnathawktuten hah taka an thawhchhuah a nih avangin sawrkar chu a thutiama ding a, mipuite ti hnual lo turin an ngen a, Congress Party chuan eng Party pawh sawrkar se la kut hathawktu te dawmkanna Programme reng reng chu an thlawp tih an sawi bawk a ni.

Hei bakah hian MPCC chuan tunhnaiah social media-ah kum 1994-a Congress sawrkar laia an siam, The Mizoram Agricultural Produces (Restriction on Movement) order 1994 chu a nihna tak hre lovin dan sakei ang hialin miten an sawi darh tih sawiin he danin a tum ber chu kut hnathawktuten ram chhunga an thlai thar thenkhatte an hralhnaah state thenawm atanga kharchhawng 'middle-men' te an lo in rawlh thin avanga harsatna hrang hrang an tawh thinte laka an mahni humhalh a nihna anih thu an sawi a, he danin a humhalh te chu sawhthing, hmarcha, chhawhchi leh la (cotton) te an ni a, he dan hian heng thlai thlan bik 5 te hi phalna bik nei lo te tan state pawna phurh chhuah a remti lo tih an sawi a ni.

<><><>

AIZAWL DAY

Ni thum awh AMC huaihawta Aizawl Sipai Lammual-a Aizawl Day 2025 lawmna chu vawiin chawhnu khan khar a ni.

Kharna inkhawm hi AMC Executive Corporator Pu Lalringlana'n a kaihruai a, Deputy Mayor Pu R. Thanglura'n thu sawiin, Aizawl day chu AMC ta ni lovin, Aizawl mipuite ta a ni a, Aizawl day-ah hian chawlh puan ni se a duh tih a sawi a ni.

Kan corr report lo ngaithla ang.

Mizoram khawpui Aizawl hi kum 1890 February ni 25 atanga luah tan niin kumin hian Aizawl chuan kum 135 a tling a. Tun thla February ni 25 atanga ni 27 inkara Aizawl Day lawmna neih chhung hian Mizo thilsiam hrang hrang leh thildang pholanna Stall leh Food Stall te chu AR Lammualah siam a ni a. Aizawl Day Concert, Cosplay, leh naupang infiamna hmun te neih a ni a, hei bakah hian AMC chuan Aizawl Day lawmna pual hian intihsiakna hrang hrang a buatsaih a, Mayor's Cup - Inter Ward Basketball Tournament (for Mens)-ah Local Council Team 37 telin, Khatla South (Ward XIV) chuan Bungkawn (Ward XV) hnehin an Champion a. College Quiz Competition-ah College 12 atangin Team 21 an tel a, Govt. Mizoram Law College chu pakhatna an ni a, AMC Short Documentary Film minute 3 chhung a rei innsiamsiakah Pu FC Lalchhuanawma, Bawngkawn chuan lawmman pakhatna a la a. Faina leh Thianghlimna kawnga mimal hma la tha mi 78 te hnenah chawimawina hlan niin. Ransom Hotel, Thuampui Vengthar chu Aizawl khawpui chhunga Hotel fai berah thlan a ni a, Donum Dei, Dawrpui Vengthar chu restaurant fai berah thlan a ni bawk .

<><><>

UNION MINISTER

Union Minister of State for Road transport & Highways and Corporate Affairs Pu Harsh Malhotra chuan Saitual District a tlawh a, Saitual District-a office hotute, Village Council leh NGO hruaitute nen inkawmhona hun hmangin, Saituala District Hospital, Govt. High School leh Tamdil te a tlawh nghal a ni. Union Minister of State hi District Bawrhsap Dr. Lalingura Tlau

bakah District chhunga officer te leh NHIDCL lama hotuten an lo dawngsawng a ni.

Union Minister of State, Pu Harsh Malhotra hoin tukin dar 10:00 khan DC Conference hall Saitualah, Saitual District office hotute, VC leh NGO hruaitute nen inkawmhona hun hman a ni a, he hun hi District Bawrhsap Dr. Lalngura Tlau chuan a kai hruai. He hunah hian Saitual District-a Deputy Commissioner Office, District Rural Development Office, Public Works Department, Public Health Engineering Department leh District Education Office lama hotute chuan an department chungchang te, an hmalakna te leh central scheme an kalpui dan te chu PowerPoint Presentation hmangin an sawifiah a. Village Council leh NGO hruaitute pawhin Pu Harsh Malhotra hnenah an mamawh te an thlen a ni.

He hunah hian Pu Harsh Malhotra chuan thu sawiin, Sawrkar laipui atanga Saitual District tlawh hmasa bertu a ni thei chu lawmawm a tih thu a sawi a, mipui tena tha taka an lo dawnsawwnnaah lawmthu a sawi nghal bawk a ni. Union Minister of State chuan sawrkar laipui hmalakna (Central Scheme) hrang hrang a bikin, Mahatma Gandhi National Rural Employment Guarantee Act (MGNREGA), Pradhan Mantri Awas Yojana (PMAY), Jal Jeevan Mission (JJM) leh Mid-day Meal te chu Saitual District-a tha taka kalpui a ni chu lawmawm a tih thu a sawi a. Harsatna an tawh te ngaihthlakna hun tha a nei thei chu lawmawm a tih thu sawiin, Pu Harsh Malhotra chuan kalkhawmte chu an mamawh te ziaka thlen turin a chah a, a theih anga hma laksak a tum thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan Mahakumbh neih zawh tak chu inpumkhatna kutpui anih thu a sawi. PM Modia chuan ramchhung rohlu te chawisan zel anih rualin chak takin hmasawwna kawng zawh a ni a ti a. Mahakumb chu zirchian tham khawpa ruahmanna felfai leh policy tha a nih zia lantirna a ni a ti bawk. Pu Modia chuan Prayagraj-a lui kamah mi vaibelchhe tel felfai taka an pungkhawm thei chu khawvel pawhin a fak a ni a ti.

<><><>

PIYUSH GOYAL

Union Minister of Commerce and Industries Piyush Goyal chuan vawiin khan Bharat Calling Conference 2025 Mumbai ah a hawng. Thusawiin Union Minister chuan sawrkarin awmze nei taka hma a lakna Make in India, Digital India, Startup India, leh Atmanirbhar Bharat te chuan ngaihtuahna thar neih kawngahte, hmasawwna ruhrel tihlen leh eibar dinhmun chawikanna kawngah chak takin an kalpui a ti a. Ramchhungah eizawwna kawngahte kawng thar a inhawng mek zel tih sawiin thiamthil tih changtlunna chuan ram eibar

dinhmun a ti nghet thin a ti a. Hun lo kal turah Skill Development chuan hna thar a siam belh dawn a ni a ti bawk.

<><><>

UNION I&B SECY.

Union Ministry of Information and Broadcasting Secretary Sanjay Jaju chuan May 1 atanga ni 4 chhunga WAVES summit Mumbai-a neih tur chu a danglam bik dawn tih sawiin media leh entertainment khawvela mi langsar tak tak an kalkhawm dawn a ti. Vawiina GAFX hawnna Bengaluru-a neih a hmanpuinaah he thu hi sawiin Pu Jaju chuan he summit hi AVGC hmasawwna kawngah a paiwmawh hle dawn tih sawiin content creator leh technology lama thiamte tan remchhanna thar a pe ang a ti bawk.

<><><>